



18372

kat.komp.

Midg. 36. Dr. p





18372

Biblioteka Jagiellońska



stdr0000343





14.
Johd
0547

CLEMENS VICTORIA

Potentiss: & Sereniss:
VLADISLAI IV.

Poloniæ & Sueciæ REGIS,

Magni Ducis Lithuanix, &c. &c.

Victoris, ac Triumphatoris,

Moschorum fortunatiss.

*Ad eadem S. ANNÆ, & Aram D. JO-
ANNIS CANTY, in Solenni gratiarum
actione, pro felicissimis acerrimi belli succes-
sibus, & celeriter receptum Seneriæ*

Ducatum.,

Auctoritate & mandato publico,

Magnifici D. CRISTOPHORI NAYMANOWIC,
Medicinæ Doct: ac Profess: Ordin: & Almæ uni-
uersitatis Cracouiens: Rectoris vigilantiss.

A

M. IOANNE CINERSKI RACHTAMOVIO, Collega
Min. Ordin. Eloqu. Profess: debito cultu, & submissâ
cum animi veneratione, celebrata.

CRACOVIAE, In Officina Francisci Cesarij, Anno D. 1634.

BIBLIOTH. UNIV.



UNIVERSITATIS CRACOVIAE



Viue potens, superatis VLADISLAE, Tyrannis,
O decus, ô Regni præsidiumque Tui.

IOANNES RAPHAEL, Comes à Tarnow.

VNIV.  IAGELL.
GRACOVIENSIS

18372, I

AD C. IULIVM CÆSAREM

M. Tullius, in Orat: pro M. Marcello.

Nulla est tanta vis, tanta copia, quæ non ferro, ac viribus, debilitari frangiq; possit: verum animū vincere, iracundiam cohibere, victoriam temperare, aduersarium nobilitate, ingenio, virtute prestantem, non modò extollere iacentem, sed etiam amplificare eius pristinam dignitatem, hæc qui faciat, non ego eum cum summis viris comparo, sed simillimum Deo iudico. Itaq; C. Cæsar bellicæ tuæ laudes celebrabuntur illæ quidem, non solum nostris, sed penè omnium gentium literis, atq; linguis: neq; vlla unquam ætas, de tuis laudibus conticescet: sed tamen eiusmodi res, nescio quomodo etiam dum audiuntur, aut dum leguntur, obstrepi clamore, militū videtur & tubarū sono: at verò cū aliquid clementer, mansuetè, iustè, moderatè, sapienter factū, in iracundia præsertim, quæ est inimica cōsilio, & in victoria, quæ naturā insolens & superba est, aut audimus, aut legimus, quo studio incendimur, non modò in gestis rebus, sed etiam in victis? vides eos sepe, quos nunquam vidimus, diligamus.

In perantiquam Iarandorum Gentem.



Quid fixus capiti gladius superminet atro?
Quodue opus, ingenti pegmate, stemma notat?
Hæresis atra fuge, atq; his te procul eripe ab armis,
Hinc procul, ô procul hinc, hæresis atra fuge,
COELVCIVS pietate grauis, meritis grauis, almis
Pugnat Pro templis, Hæresis atra fuge.

IACOBVS NAYMANOWIC, Stud. Eloqu.

Perillustri & Reuerendiſſ: Domino,

D. SIMONI KOŁVDZKI

CANCELLARIO GNESNEN:

Cuſtodi Płocē. Cracouiē. Vladislauieñ. Ca-
nonico, S.R.M. Secretario, Episcopæ Cra-
couieñ. in ſpiritualibus, & temporalibus
Generali Adminiſtratori, &c. &c.

Domino & Patrono Colendiſſ.



*Clementem Victoriā, vel potius ipſam vi-
etricem Clementiā, Sereniſſ. & Potētiſſimi
VLADISLAI Regis, ac Domini noſtri
Clementiſſ. Moſchorumq; Victoris fortunatiſſ. quam ad
ades D. ANNÆ, & Aram D. IOANNIS
CANTY, in florentiſſ. Almæ uniuerſitatis, nobiliſ-
ſimæq; Iuuentutis confluxu, officioſo cultu, & ſubmiſſā
gratiarū actione celebrauimus, Tibi Perilluſtris Domi-
ne, lubentes meritōq; cōſecramus. Quanquam enim illa,
magis omnium gentium linguis, vocibus, admiratione;
quā hac rudi Orationis impolite commentatione cele-
bretur, tamē maluimus in illius prædicatione, noſtrā elo-
quētiā ſufficientem, quā verò promptam animi pie-
tatem deſiderari. Quod tam porro illuſtre & diuinum
ingeniū, quæ tanta dicēdi vbertas atq; copia reperiatur?
quæ luculenter ſatis & expedite, tātā Dei Opt. Max.
in nos, noſtrumq; exercitum benignitatem, tantam in ho-*

Dedicatio.

Re deprimendo benedictionem, tantam Sereniss. Bellatoris fortitudinem, tãtam celeritatem in rebus agendis, animi constantiã in aduersis, æquanimitatẽ in prosperis, explicare possit? Vicit, Reuerendiss. D. felicissimus Rex noster, vicit, sed sine triumpho vicit: nimirum triumphum denegauit illi Clementia triumphatrix. Magnũ tamen tantæ victoriæ theatrũ, erectum est illi ad triumphũ, cõspectus Orbis, & admiratio vniuersi. Non solũ n. vincere fortiss. Rex noster sciuit, quod prudentia, fortitudinis, felicitatis est: sed etiã victoriã frui, quod est Iustitiæ, Clementiæ, pietatis. Non fruebatur victoriã, ut iacentem opprimeret, vel fugientem persequeretur hostem, sed quod diuinius est, ut metu fractum, tabe, languore confectum, misericordiã, & benignitate suã erigeret. Est itaq; hæc Clemens Victoria Patriæ, nobis, & Academia, populisq; Christianis, atque adeò ipsis Moschis longè gratissima. Et Grata quidẽ est nostræ Patriæ, pro quã vigilantissimus Rex, iustissimis armis decertauit: Grata quoq; Moschis, qui suã potius temeritatẽ victi, Regis verò clementiã erecti, & recreati sunt: Grata populis Christianis vniuersis, qui ex his primis, ac felicissimis successibus, futuram de immaniss: Turca, qui intolerabili fastu, acerrimo impetu, nostris inhiat regnis, ominantur Victoriã: cum præsertim contra hunc Spartacum, plenus Spe, plenus diuinis præsidys, plenus votis & ominibus auspiciatissimis, plenus prosperrima Diuorum Tutelæ

Dedicatio.

Tutelarium præsentia & fauore, cum fortissimo exercitu, felicissimus ac potentiss. Rex noster progrediatur: Grata deniq; Alma nostræ Vniuersitati: quia quo tempore sibi Sereniss. Rex Ciuicas, ac obsidionales Coronas, Manubiasq; triumphales, comparauit; eodem tempore laurum nostram Academicam, desideratissimâ ornare ac communire voluit libertate: dum auctoritate suâ, & sapientiâ propè diuinâ, eò voluntatē VRBANI VIII. Pontificis Opt. Max. induxit, ut Diplomate religiosissimo, apudq; omnē posteritatē sanctiss: caueret, ne studiorum nostrorum quies ullis impetitionibus (absit inuidia verbo) æmulorum interturbaretur; utq; postliminiò communis illa tranquillitas in Academiam, Charitas in Ecclesiam Dei reuocaretur. Quæ cum ita sint, admitte Reuerendiss: D. lubens, fauensq;, hanc nostrâ rudi quidem Orationis penicillo depictâ, sed Regis feliciss: gloriâ immortalis, condecoratam Clementiam, quæ ultro se se Tuum in conspectum longè digniss: offert & insinuat. Ad Te enim Reuerendiss: D. hoc qualecunq; literarium, animi nostri pignus spectat, quem matura prudentia, singularis in rebus agendis usus, & dexteritas, merita pulcherima, labores grauissimi, pro bono Ecclesiæ & Reip. propagâdo, luculentissimè adornât. Vidit has, in Te Reuerendiss: D. virtutes Sereniss: Rex noster, vidit Sereniss: Princeps. & Eminentiss: Cardinalis IOANNES ALBERTVS, Episcopus Crac. Dux Seuerien: Acade-

Prefatio.

*mie nostræ Cancellarius longè fauentiss: ideòq; Tibi sum
mā rei, & prouidā hui⁹ Episcopæ administrationē, cōmi-
serunt: ut Tu Reuerēdis. D. absente utroq; optimo Prin-
cipe, velut Athlas fortiss. tuis humeris, Orbē hunc Ec-
clesiasticū fulcires, erigeres, sustineres. Academia verò
qualē Te, & quantū rebus in dubijs, experiatur Patro-
num, sentiunt omnes boni, bonarum partiū, Ciues, & ar-
bitri desolatæ equitatis. Iuua, ut capisti rem nostrā, illu-
stri consilio, prudentiā. auctoritate. Tuum enim hoc est
magnificum, & eximium munus (absente Sereniss. Rege
nostro, qui iustiss. armis, audacē persequi conatur Turcā:
absente Sereniss. & Eminentiss. CARDINALI, qui
nūc officicios. iter ad S. S. D. VRBANVM VIII. susce-
pit) istā molem curarū, negotiorumq; grauiss. superare:
bona officia secūdū cuiusq; stationē firmare, quæ fluctuāt
& aberrant, à recto tramite, ad orbitā reuocare pietatis.*

*Te penes arbitrium est, & lex, & summa potestas,
Te, Spes, & ratio studiorum, in Iudice, fixa est.*

*Nos vota nostra, precesq; feruentissimas adijciemus, &
debitam apud Deum gloriosiss. instituemus supplicationē,
ut felicissimus, quā longissimos in annos Ecclesiæ, Pa-
triæ, Academiæ vinas: utq; in Tua illustri gratiā, patro-
cinio, beneuolentiā, studia nostra, & labores propēssimi,
suauissimè conquiescant. Dat. è Coll. Min. Die 15. Iulij
Anno Dni. M. DC. XXXIV.*

Perillustri & Reuerēdis. D. V. deuotiss.

*M. IOANNES CINERSKI RACHTAMOVIVS,
Coll. Min. Ordin. Eloqu. Profess.*



C L E M E N S V I C T O R I A.



VOD precati sumus à Deo
Opt: Max. per merita & suffragia
Diuorum Indigetum, ac Tutela-
rium huius Regni florentissimi,
Magnifice Domine R E C T O R,
Patres Adm: Reuerendi, Docto-
res clarissimi, Hospites lectissimi, Iuuenes nobiliss.
humanissimi Auditores; illis diebus, quibus fre-
quentes & auspicatò templa adijmus, supplicatio-
nes fecimus, vota & desideria feruentissima inge-
minauimus, id beneficio longè maximo Diuinæ
maiestatis iam tandem abundè sumus consecuti.
Et fælices illæ quidem nostræ fuerunt supplicatio-
nes, fælices illæ preces, quas partim hoc in loco
sanctissimo ad sacros B. IOANNIS CANTII
cineres, partim festo Doctoris Angelici die Diui
THOMÆ AQVINATIS, in templo & con-
spectu sanctissimæ Trinitatis, supplices prostratiq;
cum lachrymis fudimus: sed fæliciores nostrorum
Patronorum Orationes, quas in Oratorio aterni-
tatis, in Sanctuario immortalitatis, pro Sacra Ma-
iestate Regia, pro nostra afflictissima Patria, pro
B hoc

Clemens victoria.

hoc imperio amplissimo, pro salute & incolumitate Principum, pro robore ac fortitudine militum, pro nostra securitate, feruentissimè profuderunt, fœlicissimamq; nobis à Deo clementissimo benedictionem euocauerunt. Illi S. R. M. fœlicitatem, illi exercitui victoriam, illi ciuibus patriæ, pacem & concordiam, huic imperio ab eo hoste, qui nos nostrosq; vicinos, grauissimè afflixisset, quietè & tranquillitatem impetrauerunt; vt & sibi maiorem quandam gloriæ & lætitiæ accessiorem in cælis, & nobis fructum vberrimum in terris, ex his suis intercessionibus excitarint. Impulsus Moschus, Audit. ad fœdera pacis, qui tanta tonitrua, tanta fulmina tonabat, vibrabat, tanta odia, tantos furores spirabat, tantas turbas, tantos tumultus concitabat, tantam vim, tantam potentiam crepabat, tantos exercitus, tantum apparatus bellicum contra nos armabat, promouebat, & in conspectu orbis Sarmatici, magnificè id est stultissimè iactabat, ostentabat, vt nos gentemque nostram vnico propemodum flatu dissipare, vnico impetu euertere, vno haustu absorbere posse videretur! Iam nunc didicit, quid sit pugnare cum Polonis, prostituere pacem ad contemptum, fraude doloq; malorum arma temerè vellicare vicinorum, quorum iniuriæ vindex iustissimus est Deus. Quare probò laudoq;

Clemens victoria.

laudoque hoc vestrum prudentissimum, Quirites
Academici, consilium, quod die hodierna memo-
res tanti beneficij, hanc ad aram sanctissimam D.
IOANNIS CANTII, frequentes & alacres
confluxeritis, vt Deo Opt: Max: iustissimam gra-
tiarum actionem persolueretis, pro fœlicissimis,
tãti tamq; difficilis belli successibus, pro Moscho-
rum acerrimis impressionibus vindicatis, pro inco-
lunitate ciuium sociorumq; nostrorũ conseruata,
pro Smolensco ab obsidione celeriter erepta, rece-
ptoque SEVERIÆ Ducatu amplissimo, atque
inprimis pro reditu longè desideratissimo Bellato-
ris ac Victoris fortissimi fortunatissimiq. cuius sa-
lute, nostra Reipublicæq; salus, & integritas Patriæ
continetur vniuersa. Nimirum hoc vestræ pietatis
officium, DEO victori triumphatoriq; gloriosis-
simo gratissimum, Vobis honorificentissimum,
huic imperio florentissimo saluberrimum, Turcæ
deniq; deterrimo, qui execrabili in nos odio acer-
rimè efferuescit, per quam terribile est futurum.
Magna sunt hæc, Audit: clariss. sed attendite quæ-
admodum etiam cætera dicam. Sic enim profe-
ctò, si modò intima tantæ rei momenta pensitaue-
ritis, statuetis, eam victoriam, quam singulari Dei
clementissimi beneficio sumus consecuti, gratam
omnino nobis, toti que Reipublicæ Polonæ, gra-

Clemens victoria.

tam populis Christianis vniuersis, gratam denique ipsis Moschis, soli stupidissimo & abiectissimo hosti Turcæ ingratissimam esse, & summè odiosam. Neque verò à me floridam & pomposam orationem, qualem omnino aut tanti beneficij magnitudo, aut etiam loci huius dignitas & amplitudo, requirat, & exposcat, expectaueritis Auditores; hanc enim quam proferam dictionem (vt ingenuè quod in re est fatear) summis curis, egestate, laboribus, oppressus & constrictus, breuissimo temporis spatio sum meditatus.

Atque vt inde initium dicendi sumam, vnde hæc omnis victoria laudem accipit longè maximā, meritò omnes DEO victori triumphatoriq; Opt: Max. gratias agere, & habere debemus immortales; cuius beneficio amplissimo, istud bellum, tam insperatum, tam atrox, tam vehemens, tam breui tempore, ad finem optatissimum deductum est: vt omnis ille hucusque susceptus à nobis timor & trepidatio, ingenti tandem gaudio & lætitiâ copiosissimè compensetur. Itaque hæc præsens Victoria eò gratior nobis esse debet, quò nos tristioribus rumoribus afflixit mæror, sauciauit dolor, compressit metus. Dolebamus enim, Auditores, ac vehementer angebamur, cum toties cum animis nostris, grauissimos casus, formidolosos bellorum exitus,

Clemens victoria.

xitus, Martis aleam periculosissimam, gentis præterea ad mendacia vaferrimâ, fictum genium, innatas fraudes, dolos, machinationes, scelera, identidem recognosceremus: nec nobis persuadere poteramus, nec fas esse ducebamus, versari nos in vilo genere solatij, Rege ac Domino nostro clementissimo, à nobis, ab hac Vrbe augustissima, à Regno florentissimo, à patriâ charissimâ, cum lectissimo flore nobilitatis Polonæ, ad Moschos, ad perduelles, ad præuaricatores perditissimos, ad illorum sceleratam impressionem coercendam, vel auerendam diuulso, & distracto. Quis enim Moschos in aciem prouocauit? quis illos ad hoc tam graue, tamque periculosum bellum induxit? certè nullus noster impetus, nulla impressio, nulla fraus, ac ne leuissima quidem exacerbatio, vel vilius suspicio doli, à quò gens nostra vehementer, ob innatum sibi candorem abhorret. Nullam causam Moschi iustam habebant, ad vim, ad prædâ, ad latrocinia, ad crudelitatem, ad immanissimam Ciuium, sociorumque nostrorum lacerationem: tempus erat plenum silentij, plenum quietis, plenum læticiæ, plenum securitatis; ob auspiciatissimam S.R. Maiest. inaugurationẽ, apud nos: apud illos tempus audaciæ, sceleris, temeritatis. Malebant & insolentes, & impij, & fœdifragi, quàm boni, & iusti,

Clemens victoria.

& pacis amantes vicini iudicari. Non habet ista gens crudelissima, non habet eam excusationem, Audit: tempus paci præfixum effluxisse, fatis Regis optimi Sigismundi Tertij Supremis, ereptum esse fædus, Ducem magnum Electum, præsentem ad diem statam non adfuisse, tandem illud imperium regere, quod in regno auito & patrio, diademate adornaretur, non potuisse. Nempe si ita est, Moschi, quid vos tanto hoc annorum intervallo egistis? quod obsequium, quem honorem quod officium, Electo Magno Duci præstitistis? quid tandem sperastis? quid voluistis? quid moliebamini? quis erat ardor animorum? quis sensus consiliorum vestrorum? quid deniq; cupiebatis? quid optabatis? Ocium, si Deo placet, à furore, ab amentia, ab immanitate tenuistis? Ab annis ferè 20. Auditores, (nam illas veteres inimicitias, & simultates omitto) quo ad fædus percussum est, ardebant odio Moschi nostræ gentis inueterato; arma, tormenta bellica, militem, comæatum, apparabant, congerebant, fouebant, & ad omnem frangendi fæderis occasionem inuigilabant: nunquid igitur aliud præter impietatem, scelus, temeritatem, amentiam, vocare in culpam, vel incusare possunt? Volebant experiri isti Gygantes, quantum tandem profecissent Marte, quantum
viri-

Clemens victoria.

viribus; quantum operæ, in suo illo glorioſo tyrocinio poſuiſſent, quantum denique inſtructi eſſent robore belli, & apparatu militari. Ergo cùm iam ſibi ſatis exercitati, & expediti viderentur, ad velitationes, ad arma, ad prælium, abſentibus noſtris imperatoribus, & exercitibus, euolant mei Moſchi in campum, prodeunt, ex illis ſuis latebris & ergaſtulis in lucem, procul à domo, procul à patria, procul à ſua Moſchua. Cur ita? vt ſcilicet à noſtris populis, quam eſſent belluli milites conſpicerentur! Centum viginti quinque millia militum in aciem producunt, munitiones faciunt, propugnacula erigunt, inſtruunt cohortes, armant legiones, obſidionem moliuntur, tentoria collocant, denique palæſtram futuro Marti dimetiuntur.

Hic Ajax ſtabit, hic ſæuus pugnabit Achilles.

Laudo, laudo vos ô Moſchi, ſatis egregij eſtis milites, ſatis pugnaces, ſatis fortes, iam viciftis! quis enim vobis aut poteſt, aut audet reſiſtere? quis progreditur in campum? quis attentat conferre manus? Omnes in latebris hærent & latent, veſtram à longè virtutem ſuſpiciunt, veſtrum robur, potentiam, fortitudinem, demirantur, & exhorreſcunt! Iterum dico viciftis: domum migrate, cantate, triumphate!

Egregiam verò laudem, & ſpolia ampla refertis!

Quid

Clemens victoria:

Quid hæretis? quid, aut quem præstolamini armati? scilicet vt vos paucis alloquar? laudo humanitatem! Quæro igitur, bona cum veniâ Nigræ Aquilæ, & Moschouiticæ Maieſtatis, quæro inquam Moschi, quis vos induxerit ad istud tam difficile & acerbum bellum? Impedimenta enim (vt verum omnino fatear) ista video, non robora militum, quæ miseri vobiscum trahitis. Itaque si persistitis, & huic temeritati indulgetis efferatæ, non falsus vates auguror, vos manet certa nex: Si migratis tempestiuè, quod ego quidem vobis (si quid apud vos meum potest consilium) suaderem, sine prælio vestrum stuporem vincetis, vos ipsimet de vobis, inermes de armatis triumphabit. Magna illa est, mihi credite, victoria quæ stultitiam vincit, magnus triumphus, in quo victa catenis, ducitur temeritas. Quid? Huc error vos impulit? an istum errorem præter belli strepitum, & ardorem, domi, vestro in Senatu, meliori & mitiori consilio corrigere ac coërcere non potuistis? Intrusit timor; at quis hostis territabat? quis à tergo vel à fronte premebat? boni futuri spes, & cupiditas vos pellexit? quid verò in pace, quæ bona omnia, suo complexu fouet, ac retinet, aut sperare, aut amplius desiderare potuistis? Urgebat odium? cur autè hoc malo flagrabatis? coarguebat scelus, cogebat

Clemens victoria.

cogebat necessitas, quæ eiusmodi? quid aut vos ipsi commisistis? aut in socijs commissumprehendistis, ut vobis vlciscendi arriperetis occasionem? Nimis forsan vrgeo, commoueri videntur Moschi. Itaque ego vos Moschi omni sceleri eximo, & iustissimos aio, & si vultis etiam facio innocentibus. Sed si benè vos noui Moschi, nihil in vobis damno præter stuporem, & insaniam, quæ istum vobis insinuauit errorem, auxit importunum terrorem, iniecit fallacem spem, & cupiditatem, inspirauit odium, peperit scelus, aluit & confirmauit temeritatem! Quod enim monstrum aliud vestris in animis proteruiam cõcitauit? concitauit cognata proteruiæ temeritas! quod vos portentum in campum armatos protrusit? protrusit temeritas! Quis malus genius, eam mentem vobis indidit, ut nullâ iniuriâ per nos læsi, nullo damno, nullo incommodo affecti, nullis armis exacerbati, nullâ necessitate coacti, scientes volentesque nos, sociosque nostros, vexaretis, affligeretis, violaretis, hanc ipsam sceleratissimam mentem, vobis indidit & inspirauit, perditissima temeritas. Temeritas vestra pacis fœdera, Sacrosancta rupit, temeritas vos perduelles reddidit: temeritas fame & tabe miserum in modum afflixit: temeritas denique tantum vestrum, tamque numerosum exercitum absumpsit

Clemens victoria.

& exhaustit. Ac mihi quidem si proprium & verum nomen, vestri mali quærat, fatalis quædam calamitas incidisse videtur, & stupidas mentes vestras tenuisse, ut tantæ impietatis, tantæ perfidiæ, quanta vos occupauisset, testem orbem haberetis vnuerſum: tandemque vestris periculis edoceretis, nullum esse flagitium execrabilius hominibus atque Deo, quàm iusiurandi, Sacrosancto more gentium suscepti, violatam Religionem. Sed nimirum Græca vestra ista fides, & scelerato schismate contaminata factio, frangere fœdus, violare pacem, prostituere vitam & sanguinem plebis innocentis ad vim, ad cædem, ad interitum, quotidianum iocum, fannamque putat. Nihil apud vos tam sanctum, quod non contemnatis? nihil tam religiosum, & diuinum, quod non perturbetis, vexetis, euertatis. Sed iustissimus vindex & propugnator innocentiae DEVS, Vestram hanc siue temeritatem, siue superbiam, siue impietatem ita confudit & depressit, ut omnes vestri conatus, omnia consilia, omnes copiae, omnis potentia euerſa, soloque prostrata iaceant. Eam enim mentem Serenissimo REGI nostro immisit, ut nihil vobiscum temerè, nihil præcipitanter, nihil raptim, & turbulentè, ageret: Sed omnia piè, iuste, prudenter, temperatè, summoque cum consilio

Clemens victoria.

filio inciperet ac perficeret. O prudentiam, & pietatem fortissimi Regis admirabilem, atque omni laude, prædicatione, literis, monumentisq; decorandam! Meministis Auditores, (vestram enim fidem appello) meministis inquam, Serenissimum R E G E M nostrum, non prius iter ad tantum tamq; difficile bellū apparuisse, quàm præfidia è cælo firmissima atque maxima, in Basilica Diui Stanislai, per tanti Patroni merita & benedictionem sanctissimam implorauisset & accepisset? cui etiam in pignus honoris & obseruantiae sempiternum, effigiem argenteam consecrasset: non prius viæ milites accinxisse, quàm illorum animos pietate imbuisset, confirmasset: exercitum religione instruxisset, refecisset. Itaque nos à nobis, ab hac Vrbe florentissima, à patria dulcissima discedentem, votis, & bonis ominibus, etiam cum lachrymis profecuti sumus. Quid? an prius etiam pertinacem hostem aggressus est bello? an illum castigauit armis? quàm increpuit verbis? an luculenter vt vellet ad saniores redire mentem, non admonuit? Sed hostis animi impotens viribus ferox, exultans multitudine, feritate & immanitate superbus, & contumax, hæc clementissimi Ducis consilia, spreuit, despexit, violauit: arma armis opposuit, pro verbis saluberrimis, pro admonitio-

Clemens victoria.

nibus fauentissimis, minas, furorem, amentiam, obiecit & obtrusit: æquitatem scelere, innocentiam diritate, obruere ac temerare constituit. Quid faceret cum hoc amentissimo genere hominum clementissimus Bellator? quid faceret? Militi primò seruare ordinem, expedire vigilias, tenere modum in laboribus, non excurrere præcipiti impetu in premendo hoste, non se fauentis Fortunæ arbitrio totum dare, non indulgere genio, mandauit: deinde frangere conatus insolentes barbarorum, distrahere confluentes copias, turbare cohortes, arcere impressiōem, impedire insultus, coërcere hostium vim & tempestatem, propugnacula tentare, fossas saltu penetrare, nūc intra, nunc extra vallum, nunc cominus, nunc eminus experiri fortunam, vibrare tela, conferere manus, velitatiōes robustiori submisso agmine firmare, permisit: tandem iustā acie & aperto Marte congregi præcepit, erumpere in campum, conferre signa, obijcere aquilas, vim vi, milites militibus, viros vi-
ris, opponere.

Qua data porta ruunt, & campos agmine complent.
Concurritur vtrinque summo cum impetu atq; ardore pugnandi, fremitus animorum, concussio armorum, alalagmus Moschorum, nostrorum verò militum, generosus ille baritus, & D. Adalberti religio-

Clemens victoria.

religiosissima, vetustissimaque insonat, & intonat. Teltis est toties mons PROCOVIENSIS, ex quo tumidi Moschi, illiq; Boiarij turgidi, turpiter excussi, & præcipites deturbati sunt: testis est fluvius Borysthenes, eorum ipsorum sanguine cruentatus: testis est SMOLENSCVM arx, non minus suis præsidij, quàm virorum virtute, & civium fidelissimorum robore, fortissima, quæ vim & impetum barbarorum, multo tempore sustinuit, fæliciterq; repressit: testes verò sunt, illi colles, illi agri, illæ sylvæ, illi campi longè latèq; patentes, qui toties abundè perduellionum cruorem hauserunt. Illud verò cuius est & quantæ virtutis argumentû, non solum cum hoste acerrimo, sed etiam prope modû cum natura rerum dimicationem suscepisse?

*Frigora sæua pati, rigidis non cedere nimbis,
Ventorum rabiem, tempestatesq; sonoras,
Et genium superare loci, superare Triones,
Et septem gelidæ stellas Erymanthidos vrsa?*

Quid ego primum admirer, Audit. quid laudem, quid deprædicem, in Sereniss: Bellatore? an pietatem, & æquitatem in suscipiendo & promouendo iustissimo bello? an patiëntiam in aduersis, magnanimitatem in prosperis, dexteritatem in agendo, celeritatem in conficiendo, prudentiam in prouidendo, fortitudinem in pugnando, fælicitatem in

Clemens victoria.

vincendo, animum suspensum habeo! Has enim
felicissimus Rex, ita Herculeo quodam nexu, con-
iunxit & consociauit virtutes, vt omnino difficile,
propter admirabilem quandam excellentiam, &
summam in omnibus potestatem, de singulis iudi-
cium sit futurum. Verùm enim uerò, Phormione
sene magis ego delirarem, Aud. si auderem de tan-
tis virtutibus Regis fortissimi, vestro in conspectu
longè grauius disputatione, quibus non dico ornā-
dis, sed vel enumerandis, nulla sufficiat oratio. Ita-
que illud gloriosum Iulij Cæsaris symbolum meri-
to forsitan possem tantæ accommodare victoriæ: *veni,
vidis, vici*: sed ne insolentior & ambitiosior vide-
atur vox, tibi potiùs ac iure meritissimo DEVS glo-
riosissime, tanti hostis, tam ferocis, tam immanis,
tam numerosi victoriam adscribo, & concedo per-
libenter. Quid enim nos habere boni possumus,
nisi de tuis manibus acceperimus? Tu Religionem
sanctissimam, religionem Catholicam, religionem
tuis beneficijs, & miraculis amplissimis cōmunitā,
à qua semper impio excæcati schismate, abhorrent
Moschi vehementer in nostro Rege fortissimo, in
exercitu Polono defendisti: tu nostras cohortes,
nostras legiones contra temerarium hostem arma-
sti, promouisti: tu militum robur auxisti, fouisti:
fortitudinem erexisti, confirmasti. Agnouerunt
per-

Clemens victoria.

perduelliones nostro in Rege sumam tuam benedictionem, perspexerunt virtutem, senserunt, & admirati sunt, animi decus magnanimitatem: itaque non etiam nos de illis, sed tua vindex Iustitia triumphat. Non illi nostri exercitus viribus depressi, sed tua potēti virtute, quā nostro Regi victoriosissimo, nostro exercitui patientissimo, nostris militibus gravissimis malis fatigatis concessisti, accommodasti; fracti, superati sunt. Quid vultis amplius Audit. clariss. quod in quiete vivamus felicitatis est: quod virtute fortissimi Regis fruamur, & gloriemur, illius Iustitiæ, Fortitudinis, Prudentiæ, Temperantiæ munus est: fructus magnorum tanti Bellatoris laborum nostra est salus, & incolumitas, Patriæ decus, gentis gloria, nominis immortalitas.

Tanta enim hæc est Victoria, Audit. (vt semel omnia dicam) vt Rex ipse fortissimus de fortuna, clementia verò de Rege, & victore fortunatissimo triumphet: ac ideò non solum nobis, sed Moschis etiam deuictis, longè gratissima sit. Moschos quidem fadifragos fortissimus Rex, sed fortior etiam clemētia, quæ sponte calamitosi & afflictis occurrat, nullius oratione euocata, fortissimum vicit Regem. Quantò nimirum Moschorum temeritas obstinatio fuit: tantò M. R. benignitas illustrior, & in summa rerum omnium potestate moderatio
diuinior

Clemens victoria.

diuinior eluxit. Quid tam porrò regium tam liberale, tam munificum (ait Suadæ medulla Tullius) quàm opem ferre supplicibus, excitare afflictos, dare salutem, liberare periculis, retinere homines in ciuitate. Attulit opem supplicibus clementiss. Victor VLADISLAVS, attulit Aud. ad bonam spem afflictos excitauit: salutem perditis & deplo- tatis reddidit: summis periculis perduelles libera- uit: armis, temeritate, metu fractos, fame, languo- re, contagione consumptos & exhaustos, extremis pænis ac supplicijs meritò destinandos, conficien- dos veteratores, hostes (quis credat) teterrimos, truculentiss. qui ad sorbendum nostrorum ciuium sanguinem conspirassent, ac vndiq; confluxissent: qui efferatam in nos rabiem, & immanitatem suam indignissimè effudissent, euomuisent: qui acerrimo impetu, nostros fines, nostras ciuitates, nostras ditiones, vastassent, vexassent, violassent: hos inquã tam truces, tam execrandos Patriæ nostræ parrici- das, clementiss. Victor VLADISLAVS vtrò & consultò, vitæ, patriæ, libertati donauit: mærentes refecit, inermes armauit, sordidatos & squallore propemodum confectos adornauit. Quare non mihi quisquam Alexandros Macedones, C. Iulios Cæsares, Octauianos Augustos, T. Vespasianos, An- toninos, Traianos, Constantinos, Theodosios, ma- gnifica

Clemens victoria.

gnificâ iactet oratione , vellaudibus efferat : illos enim ornabat Clementia, noster Sereniss. VLA-
DISLA V S ornat Clementiam: illi hanc nonnun-
quam virtutem colebant : noster clementiss. VLA-
DISLA V S semper exercet, semper retinet, ac om-
nino hæreditario iure possidet. Hausit eam Sere-
niss. Rex, ab optimo & hæroicis virtutibus orna-
tissimo Patre mansuetudinem, cæterasque virtu-
tes S. R. M. dignissimas, quas in annalibus æterni-
tatis, in animis & pectoribus gratæ posteritatis
prouida Fama defixas, celebrabit, propagabit. SI-
GISMVNDVS quidē fælicissimus hâc animi mo-
deratione, in Basilio S V I S C I O, in Ioanne & De-
metrio fratribus vsus est, vt etiam cum mortuis
tantæ monumenta virtutis remanserint: VLADI-
SLA V S verò eandem magnanimitatem in Seyno,
Ismaele, Prozorouio cæterisque Boiarijs illis tu-
midis, & deuicto Moschouitico exercitu luculen-
tissimè probauit. An quæ maior & illustrior dari
Clementia potest? *Non insultare iacenti*

Mallebat, mitis precibus, pietatis abundans,

Pænæ parcus erat : paci non intulit iram.

Post acies odijs, idem qui terminus armis ;

Profuit hoc vincente capi, multosq; subactos

Aspera latura commendauere cateruæ.

Magnarum largitor opum, largitor honorum.

D

Pronus

Clemens victoria.

*Promus & in melius gaudens conuertere fata,
Hinc amor, hinc clemens habuit victoria robur.*

Quasi verò meritò clemens Alexander Macædo dici possit, apud quem vxor Darij mærore contabuit: nulla conditio Pacis nisi victoriæ cruentæ valuit: ipse denique Darius Regno vitâq; miserè spoliatus occubuit. Quid Iulium Cæsarem summis laudibus celebras M. Tulli, qui varijs prælijs cētum quadraginta duo millia cecidit, trucidauit: ciuilem autem quem pharfalica dimicatione fudisset, sanguinem computare nō est ausus? Tantamne in laudibus eius ponis, (vt sapientissimè Plinius ait) humani generis iniuriam? Nimirum, non ex animi tui sententia, istam te instituisse commendationem, sed ex necessitate respondes. Nimium ingeniosus es, heccine verò grauitas, est & constantia, viri boni dicendi periti? Iam alios non discutiam siquidem tantus Orator turpiter hallucinatur. Satis enim constat nullum in illis verum Clementiæ decus, nullam intimam indolem, sed aut fucum, aut inanem ostentationem extitisse. Admirabilis hæc virtus est Audit. cuius gustum infima ingenia non habent, superba & atrocia respuunt, diuina & illustria recipiunt, & sanctissimè complectuntur. Nihil enim est (ait Hieronymus Oforius Lusitanus, Episcopus Algarbien: lib: 8. de Regis institutione)

in re-

Clemens victoria.

in rebus humanis clementiâ, & benignitate, & hominum charitate diuinius. Qui igitur quantum potest, hominibus opibus, & studio, & gratiâ consulit, est iam quoddammodo diuinitatem affectus. Animus igitur humanus cum ad Dei similitudinē, quam natura vehementer expetit, Dei ipsius munere, & beneficio peruenerit, quantâ suauitate complebitur? quantis gaudijs efferetur? quàm incredibilem lætitiā, ex tantorum bonorum recollectione percipiet? eam certè quam nemo vel vbertate orationis explicare, vel ingenio & ratione cōplecti valeat. Quo autem plures homines sunt diuini Numinis consilio, atque benignitate seruati, eo maiorem voluptatem capiet; magis enim ad Dei similitudinem accedet.

Neq; verò est vlla maior A. & illustrior gloria, nulla solidior virtutis cōmendatio, quàm quæ ab hoste non exprimitur, sed spontè porrigitur. Magnum est pœnitendi remedium, si hostis verè supplicet, si supercilium ponat, si se causamq; damnet. Quid igitur horum Moschi? Fatentur Aud. suas quidem copias, & magnas, & omni apparatu bellico instructas fuisse; sed nostram virtutem, ac fortitudinem maiorem, quod Dei potentissimi benedictionem longè maximam possedisset. Nunc stupent & mirantur, quomodo tantâ militum multitudine &

Clemens victoria.

præsidis obarmati, prius exarmati, & collapsi
sint, quàm sensissent: prius à victoria deflexerint,
quàm se victos & superatos intellexissent. Non
iam nobis probra, non minas, non maledicta inge-
runt, (ô incredibilem mutationem animorum, &
vicissitudinem rerum admirandam!) sed laudes cō-
ferunt, congratulationes ingeminant, lætitiā &
amicitiā suā abundè contestantur. Non peni-
tus ingratisimis illud quoque damnum animis ac-
cipiunt, quod suā sibi temeritate pepererunt. Non
numerant strages, sed condemnant: sibi irascun-
tur, quod non eadem calamitate perierint, quam
simili scelere approbassent: ac denique si vel leuif-
simum contra fœdera, delictum commiserint ipsi
sibi pœnas districti Iudicis, vltricesq; Diras, & Fu-
rias imprecantur. *Audiat hoc Fas, Iustumq;* audi-
āt Diui Cælites, si nos (aiunt) *primi fregerimus condi-*
tiones Pacis æternæ, si nos hoc sacrosanctum fœdus
prostituerimus ad contemptum, nobilissimamq; gentem
Polonam, sociosq; sollicitauerimus, temerè uel consultò
ad bellum: ita nos feri Deus omnipotens vindici dex-
terâ, prout vales pollesq;: immitte pestem, famem, ri-
xas, dissensiones, tumultus intestinos: nostra nos impie-
tas subitò, quâ clementissimum læserimus Principem,
tuo fulmine feriat, perimatq;. Dignus enim es iustis-
sime Bellator, (attendite Audit. ita Moschi S. R. M.
funt.

Clemens victor̃a.

sunt allocuti) dignus es *Serenissime VLADISLAE*,
ut non solum Te gens nostra honoret, sed laudet orbis
Et suspiciat vniuersus. Non laborauimus equidem,
non sudauimus ingeniis, quod fieri solet in tantis peri-
culis tentare, quonammodo dicendo misericordiam tu-
am commoueremus: sed tu prior *VLADISLAE*
noluisti in miseria multorum perfugium misericordiae
tollere. Tua clementia presto supplicibus adfuit, Tua
nobis clementia vitam reddidit, inermes armauit, cum
honore militari ad Patrios Lares dimisit. Perissemus
omnes, nisi quidam proterui perisissent apud Te: sed nos
à Te victi, per Te redditi sumus salutem, redditi vitae,
redditi patriae, redditi libertati. Quis non eam vi-
ctoriam probet, in qua occiderit nemo nisi armatus?
Ingratissimus ille est, Et hac luce indignissimus, qui ar-
morum periculo liberatus, animum tamen retinet ar-
matum. Iam tandem credimus, quod antea audieba-
mus tantum, nihil te citius solere, quam iniuriarum
obliuisci. Iam sentimus ipsi, Et experimur, quod cum
facile exorari, tum semel soleas exorari, quae virtus
Heroum est. Parcere subiectis Et debellare superbos,
Tuum est. Fatemur planè fortissime Et clementissi-
me Victor, quod sentimus, si in hac tanta Tua fortuna
lenitas tanta non esset, quantam Tu per Te, per Te
omnino dicimus, obtines (intelligimus quāquam Mo-
schi simus quae loquamur) acerbissimo luctu, redunda-

Clemens victoria.

ret ista victoria. Quàm multi enim essent de victori-
bus istis fortibus, qui Te crudelem esse vellent: cum
etiam victi id nobis meritò accidisse fateamur: quam
multi impedirent benignitatem tuam, & Te nollent
esse misericordem, quorum nos animos, scelere, perfidi-
diâ, temeritate exulcerauimus; quorum patres, filios,
fratres, amicos, neci dedimus. Non eam virtutem à
PHILORETICIO experimur cui paremus inui-
ti. Iam ille multos, quos tu victor iustus, vitâ donasti,
Tyrannus impius iugulauit. ISMAELEM cum
filio occidit: Socerum suum fustibus contusum extra
mare in perpetuum exilium amandauit: SE-
HYNNVM quem Tu Victor iustus emisisti cum
reliquo exercitu incolumem, contrucidauit reducem.
Te virtutesq; Tuas spontè Magne Dux, quem nobis
olim summo consensu elegimus in animis & pecto-
ribus nostris fouemus: quanquam confessionem
linguae, timor præcludat manifestus. Quàm cru-
dele seruitutis genus est, intra abominari, palam lau-
dare, benefacta agnoscere, nulla experiri. Sed nostrâ
indulgentiâ, & stupore, hæc tyrannis, quo diuturnior
est, eo non in odium magis, quàm reuerentiam & me-
tum crescit. Itaq; alium in patrio Regno Ducem, vel
potius Tyrannum: alium Te extra patriam patrem, &
multorum populorum pastorem, & defensorem longè
benignissimum habemus, honoramus. Si tamen is, qui
nobis

Clemens victoria.

nobis, & patriæ nostræ fauet, extra nos, & nostram patriam manere potest. Nobiscum viuis, & viues Sereniss. VLADISLAE, viues omnino nobiscum, cum Te ex intimis animis diligamus, amemus, honoremus. Non enim si sumus Moschi, & ut multi putant barbari, omnem e mentibus eiecimus candorem: imo nobis integer manet, quo nondum vsi sumus, nec adhuc in vero principe exercuimus? Sed quis satis Tuas virtutes laudare potest, quæ ipsam inuidiam superarunt, nobis quietem, pacem utriq; Regno reddiderunt? hæc summa principis est laus, petitur hæc calum viâ. Si quid iste Tyrannus attentauerit furoris, Tuum auxilium implorabimus in aduersis, consilium sequemur in prosperis. I felix, quo Te Dei benignitas, quo Te Tua virtus ducit, fortissime VLADISLAE: I felix, contra alterum orbis Tyrannum Othomannidem, qui Tuum legatum contra Ius gentium, qui pacem, qui fædera, qui amicitiam Tuam reiecit, contempsit, violauit. Perge, concute barbaros, vibra arma in hostes, promoue victorias, gloriam, imperium: nos Tibi nostrum nunquam denegabimus obsequium: imò sub Tuis Aquilis, in omnem hostem pugnabimus. Erit VLADISLAE potens & illustre nomen Tuum gentibus, quæ veri Dei scientiam non habent, erit Tuis ciuibus, Tuo Regno gloriosum, gratum Deo.

Creditisne Aud. tantas fieri gratulationes ab hostibus

Clemens victoria.

stibus, (quanquam non iam hostes illi nominandi, qui nobis æterno vinculo fæderis & amicitiae confociati sunt, neq; nos amplius illis, hoc nomen sine sacrilegio possumus obijcere) sed creditisne tantas fieri gratulationes à Moschis, quæ nobis pariant stuporem, eliciant lachrymas, excitent lætitiā, eripiant vocem, superent fidem. Quid dicam de omnium gentium, populorumq; Christianorum, summo consensu, & voluntate, in his laudibus, & congratulationibus augendis, & amplificandis? quibus illi linguis, quā commendatione, quibus præconiis recentem S. R. M. victoriā celebrant? Laudant illi profectò Iustitiā, commendant prudentiā, extollunt fælicitatem, deprædicant constantiā & animi magnanimitatem, cæterasq; virtutes tanto Principe, tanto Rege, tanto Victore dignas; sed imprimis stupent, & suspiciunt Clementiā; quam solam multi docti, & sapiētes viri, maximum optimi Principis decus, ac ornamentum iudicauerunt. Quæ itaq; Principum, Regum, Imperatorum opt. potentiss. sapientiss. de hac victoriā iudicia vetustas vnquam obruet? aut quæ delebit obliuio? quæ fortuna, quis casus, aut quæ tanta possit omnium gentium iniuria cōfundere memoriā, vt simul gloriā Sereniss. VLADISLAI Regis amplissimā, in hoc facinore Clementiæ nobilissimo

Clemens victoriâ.

bilissimo obfuscet, & obumbret. Gaudet nunc, & summa lætitiâ erigitur VRBANVS VIII. Pontifex Opt. Max. & suam hoc in filio benedictionē fatis vberem & copiosam, tempestiuē floruisse recognoscit: Sentit, videt, intelligit, studia, labores, conatus, S. R. M. in Reip. Catholicæ bonis propagandis, quos Illustriss. Legatus Georgius OSSOLINSKI eloquentiss. & prudentiss. Patriæ Ciuis, magnificâ & illustri oratione exposuit: agnoscit Heroicum animum, qui & Academicæ Palladi defendendæ, & Marti Sarmatico promouendo sufficiat.

At verò Nos ipsi Aud. quâ lætitiâ efferemur, quibus gaudijs, quibus gratijs, & congratulationibus insistemus? cum præsertim hoc tēpore ipso, quo recentem S. M. victoriam celebramus, ingens beneficium, acerrimis dissensionibus, odijs, simulatibus, superioribus annis vexatū, & miserè laceratum, illustri gratiâ, consilio, auctoritate S. R. M. recuperatum, & postliminio ad nos reuocatū retineamus? Iam tandem sanctissima illa animorum consociatio, & verè Catholica charitas, nobis atque huic vrbi, imo orbi Christiano restituta est, quæ ab omnibus optimis Patriæ Ciuibus, vehementer desiderabatur. Quis non doluit, quis siccis oculis aspexit, has ædes Sacras, hæc

E

domi-

Clemens victoria.

domicilia Musarum, has aras libertatis, quas æternitati Indigetes Regni fauentissimi seruant, & custodiunt, quoties inter grauissimos turbines, huius vrbs augustissimæ Ciues nec inimicos suos dignoscerent, & ab amicis etiam timerent. Horret animus meminisse malorum, quæ sustinuimus! Satis constat quàm fuerit hæc grauis & acerba, quæ pro legibus patrijs, & libertate suscipiebatur concertatio. In magnis doloribus quis nisi stupidus, tenere silentiũ potest? quis inter publicos tumultus, rixas, odia, tranquillitatem animi fouere? Cum te vrget externus impetus, timpana auribus tuis obstrepunt, siccæ oculos perstringunt, iudicia mentem terrent, quo consilio miser, illam animi libertatem ingenuam temperabis? quomodo reconditæ sapientiæ mysteria tractabis, quæ ad Dei gloriam amplificandam, ad patriam ornandam, ad religiosarum Familiarũ receptacula illustranda, Reipub. integritatem, vitæ sanctitatem, morum dignitatem comparandam, plurimum valent? Quomodo illa præsidia retinebis? vt rudem ætatem, ita instituas, vt neque tuum exemplum ad contemptum, neq; mores ad leuitatem, neq; vitam ad simulationem prostituas, cum sis ipse grauissimis vndiq; simultatibus, tanquã laqueis irretitus? Omnino enim honesto sæper ocio

*Musæ quæ
sem amant*

Musæ aluntur, quiete, non ostentationem amant:

opus

Clemens victoria.

opus dignum luce, dignum memoriâ, dignum æternitate, secretæ à turbis, & strepitu vulgi conficiūt: procul ab illis ingenijs, velut ab aula Pyrenæi auolât, quæ turpi ambitione flagrant, in locis puris & innocētibus animis habitât, vbi facilius ipsam sapientiâ inuenias, quàm hominē! An credim⁹ alibi, quàm in his penetralib⁹ secretioribus, viros principes omnes, & illustres hausisse eruditionē? Quid? Socrates, Plato, Aristoteles, quid Pythagoras, cæteræque immortales illæ animæ, quæ doctrinâ & sūmis virtutibus floruerūt, nonne sub Academicis vmbraculis, & Lycæi, viridarijs amænissimis Musas educarunt? nonne quietem omnes & animi secretissimū silentium coluerūt? quietē moribus, vitâ, cultu corporis, compositione morum, non simulatione virtutum approbarunt. Neminem ista quies sollicitudine conficit, neminem lædit: nihil ambit præter virtutem, nihil præter dedecus execratur, vero labori intenta deditaque, se à fūco, à fastu, ab oculis hominum eximit, maximamq; in sapientiæ possessione collocat voluptatem. At inter ingenia disparia, magnum feruorem ad studia excitat æmulatio? Sensimus, experti sumus, satis luculenter intelleximus, vberes illius fructus. Æmulationem tu illam vocas, quæ parit odia, fouet simultates, producit scandala, eripit animis candorem, bonis studijs quietem, ingenijs fidem, lædit

Clemens victoria.

cōmunem charitatē? at ego quo illam satis digno
compellem nomine non reperio. Vtinā tale mon-
strum nunquam erumpat in conspectum patriæ,
quod tot mala parturijt, tot extinxit bona. An
quæ potest esse quies in eo animo, quem inflat
ambitio? quæ pietas, quam simulatio tegit? quæ
prudencia, quam calliditas attenuat? quæ morum
grauitas, quam leuitas inficit? quod acumen ingenij
quod fastus opprimit? quæ possessio atq; gloria so-
lidæ eruditionis, quam vanitas comitatur?

Sed veteres tandem præstat componere turbas.

Sufficit illa nobis hæreditaria ad gloriosam æmula-
tionē cōsuetudo, cum æqualib⁹ labore cōtendere,
sine exacerbatione; industriâ prælucere, sine fastu:
modestiâ amorem conciliare, sine supercilio: mul-
ta nosse, multa ingenio voluere ac penetrare, sine
arrogantia & contemptu aliorum: minimū de-
se loqui, cum animi submissione; ingenuo ingenij
candore omnes excipere, probri impatientiam,
gloriæ honestam auiditatem præferre; optimos
& doctiss. mirari & imitari: atque vt vno verbo
complectar omnia, eximio boni Academici amo-
re flagrare: quo commune patriæ bonum promo-
uetur. Quid illa? fractos & depressos literarum
alumnos erigere, excitare beneficijs miseros, cum
amicis officijs, cum industrijs eruditione, cum in-
feri-

Clemens victoria.

feriosibus comitate tanta certare, quantam vigor ingenij, venerabili literarum, & virtutum beneficio excitatus, subministrare potest? Adsit oportet ratio quædam conformatioq; solidæ & non adumbratæ virtutis ac doctrinæ, facilis ad compræhendendam omnium beneuolentiam, vt libertatem in vita, auctoritatem in moribus, pietatem in corde retineas: animum à falsis opinionibus, linguam à contumelijs, oculos, aures, ab improbitate rectorqueas: omnes denique integerrimi & grauissimi viri numeros absoluas: nunquam inquieto auidoq; in res nouas ingenio abripiaris, maiorum instituta, quasi Sacrosancta Oracula reuerearis. Sanctum propemodum illud esse debet ingenium, quod thesaurum fouet Sapientiæ: non diuitijs turgescat, non auaritiâ infletur, non vllis cupiditatibus effruescat: humana inferiora præ se putet omnia: non diffluat luxu, non corripiatur ambitione, non rebus prosperis insolescat, non arduis de solida virtutis statione deijciatur: in his constantiam, in illis fortitudinem, in omnibus incredibilem quandam facilitatem retineat: sit denique quantum ad familiaritatem mite & iucundum, quantum ad literas ardens, & solidum, quantum ad labores felix & robustum, quantum ad egestatem patiens & expeditum. Hæc sunt quietis Academicæ monumenta, hæc illustria decora, hæc orna-

Clemens victoria.

menta excellentis, & eximiæ libertatis. Quare meritò gaudemus omnes Aud. clariss. & incredibili lætitiâ perfruihur: iam tandem aliquândo Musis Academicis vitam, bonis ingenijs vigorem, literis quietem, exedris decus, plebi pacem, Ciuibus faustitatem, templis sanctitatem, vrbi tranquillitatem, huic nobilissimo Lyçæo securitatem & veram libertatem, officiosis nimium operarijs bonam mentem, nobis splendorē, & amænitatē, votis & suspirijs omniū longè desideratissimam, amplissimo beneficio S.R.M. & Sedis Apostolicæ volūtatē esse restitutā. Ergò tibi inprimis Deus Opt. Max. qui charitas es, & omnis tranquillitatis fons & origo, gratias submissè agimus. & habemus immortales, qui eum animum Sereniss. Regi nostro, ac Domino clementiss. inspirasti, vt insolentes illos in vrbe regia motus prudentiâ, & admirabili consilio còerceret, summū rigorem, atq; potestatem authoritate temperaret, Academia denique huius inter bellicos tumultus longè maximos, memoriam, amplissimā cum beneficentiā conseruaret, ac retineret.

De nostris illi ô Deus annis suffice vitam,
Fortior, vt fælix, augeat, imperium
Magne sunt Sereniss. Rex & illustres Tue virtutes
(vt S.M. quoq; Tuam absentem, summa cum sub-
missi-

Clemens victoria.

missione & animi veneratione alloquar, cuius amplissimo præsentibus omnes beneficio perfruimur) Magnæ sunt inquam Clementiss. VLADISLAE Tuae virtutes, quas simulac primum fasces imperij & diademata suscepisses, magnis in senatu rebus summâ prudentiâ confectis, contra perduelles probauisti, exercuisti; illorum impetus insperato aduentu fregisti, depressisti; violati iusiurandi Religionem iustâ ultione castigasti; fortitudine denique, clementiâ, felicitate hostes superasti: sed & Academicam, nobis libertatem, & Nos latos atque alacres Academicæ libertati reddidisti. Reddidisti nobis nostræ pristinae vitæ consuetudinem Sereniss. ac potentiss. Rex VLADISLAE reddidisti, & omnibus bonarum partium Ciuibus, ad benè de Academia nostra, omnique Rep. Polonia sperandum, quasi signum aliquod erexisti. Perspectum enim est, nobis quidem in multis, sed maximè in præsentibus hoc tanto beneficio, Te auctoritatem Tuorum Maiorum, qui integrum ius libertatemq; docendæ Academiæ concesserunt, memoriamque Magni Regis tui Abau Vladislai Jagellonis, in summa veneratione atque honore fouisse, & intensissimam in Academicis disciplinis amplificandis, curam & cogitationem defixisse. Ille quidem Tuus Atauus in caelesti Prytaneo constitutus, cum ista viridaria Lycæi reflorescere videt, gaudet & letatur, quodque fructus tanti beneficij

Clemens victoriâ.

beneficij amplissimus, ad omnem posteritatem Tuâ auctoritate promoueatur, vehementer exultat. Ex quo profectò intelligis, quanta in propagato & conseruato Reip. bono sit laus, cum gloria tanta in excitato reperitur. Quare celebrate viri doctissimi, tanti beneficij memoriam, retinete in animis, & pectoribus vestris tantum decus, tantam beneficentiâ: contendite ingenijs, doctrinâ, eloquentiâ, vt posteritas omnis, nos gratos, nos pios, tantæ pietatis fuisse recognoscat. Vos præsertim viri præstantissimi vos decebit pro virili quemq; eniti, vt hanc fortissimi fælificissimiq; Principis gloriam, omni Scriptorum, artiumq; genere celebretis, cum ob reliquas innumerabiles illius virtutes, tum ob hanc quâ proximè, ac liberalissimè nos complectitur, quæque huius est propria Lycæi, quòd tam beneuola est illi, benignaque cura nostri, vt non diligenter modò, sed sollicitè etiam studiorum nostrorum, id est quietis, gloriæ, felicitatisque nostræ habeat rationem. Sed minimè dubito gratas fore Musas Academicas, gratas nostras Camænas, tanti beneficij, tantæ libertatis. Et celebrabuntur quidem Serenissimi VLADISLAI IV. non solum trophæa longè pulcherrima; Ciuiçæ, Obsidional'esq; Coronæ, apud seram posteritatē efflorebūt, laureati Fasces, paludamenta, trabeæ, in omni prædicatione vigeant:

Clemens victoria.

vigebunt: sed etiam hæc restitutæ literariæ tranquillitatis monumenta. Non solum commemorabunt posterī, vt fuerit depressus insolens temeritate Moschus, vt fugatus Scythes, castigatus armis Othomannides, sed etiam vt fuerint Ciues Pacis, excitati ad animorum consociationem. Nulla ætas, nulla temporum diuturnitas, exhauriet tantam, tamq̃ studiosam, reparatæ Academicæ libertatis memoriam. O magnificum eruditæ gratitudinis mysterium, quæ cultores ac Mæcenates suos, annalibus inscribit æternitatis! Casimirus ille cognomento magnus, maioribus olim nostris regnavit fælicissime, qui tanta bona Reip. peperit, tot arces, tot propugnacula erexit, vt meritò solus inter principes, nomen Principismagni meruerit: at illius tamen non tam frequens est apud nos mentio, atque tua VLADISLAE Rex Iagello, excitator huius Lycæi, atq̃ parens gloriosissime. Tibi omnis posteritas, in acceptis refert, quòd gens nostra deposuerit barbarië, hauserit ex literis humanitatē, quòd tēpla decus, vrbes nitorē, Ordo Equester splendorem, Senatus prudentiam, agri deniq̃ isti Poloni, admirabilem quandam, ex tuo beneficio receperint amantitatem. Viget Candor in animis, abest fucus à moribus, adest Senator consilio potens, deest simulator callidus, o-

Clemens victoria.

omnia plena gloriæ, plena illustris Famæ, ex hac tua studiorum, & Academiæ erectione, ad nos, & tuam posteritatem, copiosissimè promanarunt. Tibi nos debemus D. IOANNEM CANTIVM, fydus nostrum, Patronum nostrum eximium, parentem pietatis, authorem eruditionis, prodromum sanctitatis, Tutelarem, & Indigetem huius Domicilij, & Imperij florentissimi. Durabunt hæ pietatis aræ, hæc templa Sapientiæ, dum illius memoria, nomenque manebit: imò tuum quoque simul decus durabit, quòd illius, tuo beneficio virtus illustrior sit: nulla ætas vestrarum laudum prædicationem conticescet. Omnis posteritas denique celebrabit Tuum abnepotem Sereniss. nostrū VLADISLAVM, ob solidam Virtutum Tuarum Imitationem: laudabit illius in hostes deuictos Clementiam, deprædicabit & summis efferet laudibus, in conseruandis, & exornandis Studijs Academicis, admirabilem pietatem, & summâ veneratione beneficentiam dignam.

Sed nos repente, dum de in maximis beneficijs verba facimus, grauis terror opprimit Aud. Ille, ille immanissim⁹ Tyrannus Turca, inflāatus furore, ardens iracūdiâ, cōpulsus amentia, ingenti cum exercitu, nostrum Regnum inuadit: eiaculatur odia, concrepat iras, vim maximam, lanienas inauditas, extre-

Clemens victoria.

extremum excidium nobis, nostroq; Imperio minatur, & intentat. Octingenta tormenta bellica (quis credat!) itemque quadraginta alia vasta, & ingentia, ad expugnandas, & diruendas nostras vrbes secum trahit: iam consceleratissimum Abasi Bassam, colluuiem Scythicam pernicem illam, & truculentam, ab omnibus partibus, quàm celerimè submittere iussit: Lupulum Valachiae principem, suos sibi liberos, fidei obsides, mitteret, & paratū viginti millium præstò haberet exercitum, imperiosissimè monuit. Quam multa sunt quæ nos terreant Aud. Nam de apparatu nostro bellico, quid aliud dicam, quàm quod languidus sit, & intempestius, & rapinis, lachrymisque hominum egentissimorum inspersus, & infectus? At vos Ventres, bibones, Thrasones, vaccipetæ, galinipetæ, quousq; tandem in his pagis, & oppidis, colonis miserrimis insultabitis? quem ad finem se se effrænata iactabit audacia? Ideone vos, vigilantissimi Patriæ nostræ defensores, iustis præmijs, & Stipendijs, ornarunt, auxerunt, instruxerunt, expediuerūt, vt hic in maximo Patriæ discrimine languidi, & ociosi hæreretis? rapinis per summam audaciam indulgeretis? Non vos terribile illud mouet rapacis & violenti militis supplicium quod lib. 9. noster Historiographus summâ fide re-

Clemens victoria.

cenſet? Non rem verbis exaggero, nolo extremam hominis calamitatem, horribili dictionis fragore, terribilem reddere, ipſum Cromerum audite. Homo inquit quidam ſplendidus, & equeſtris ordinis, ſed violentus, & rapax, & ſuis iuxta ac alienis hominibus grauis, cùm grauitè ægrotaret, admonitus crebrò, à religioſis quibuſdam viris, vt ad Dei clementiam confugiens, animæ ſuæ ſaluti conſuleret, negauit, ſibi ueniæ locum relictum eſſe: Iam ſe diuino iudicio, traditum eſſe dæmonum poteſtati. Nec mora, audiuntur à circumſtantibus, vehementium verberum, & percuſſionum ſtrepitus, apparent in corpore ægroti facti liuores, atq; vibices, ita vt omnes obſtupeſcerēt. Inter hæc ille infælix, nullam vocem, nullumque gemitum edens, ter infelicem animam exhalauit: hîc orſus ſupplicia, quæ deinde apud inferos, æternum expenderet, vt eſſet exemplo ijs, qui ex aliorum incommodis, ſtudent ſua comoda parare. Equidem perhorreſco, rapaciſſimi homines, dum ſacras quaſdam ſudaſſe imagines, emiſſiſſe lachrymas, ſtillaſſe ſanguinem recogito, ne veſtram multorumque Ciuium portenderint vltionem. Itane verò pugnatur? Iſtinè ſunt hoſtes? miſeri coloni, quibus eſcam ab ore extorquetis, ſanguinem è corpore exhauritis, vitam propemodum ipſam
in regno

Clemens victoria.

in regno Patrio, eripitis? Nimirum nunc nimium fortes, nunc animosi estis? iam tandem properate in hostem, arma stringite, præsto adest, in finibus, vobis se ille offert, quid hæretis? quid trepiditatis? pugnandum est, fortiter pro Patria vobis, aut vincendum, aut moriendum est. iubet vigilantiss. imperator. Plus apud vos valet boum, aut vaccarum boatus, quam tuba militaris, aut classicum bellicum? Ite, ite, miseros agricolas non affligite, parcite Cuius exhaustis: satis rapinarum est, laboris vestri, & industriæ nihil. Ideò frequenter extremum vos manet exitium, quòd fletus, ex lachrymæ, expeditionem vestram, comitentur. Quis vestrum non exhorrescat Aud, quis animo, & omnibus artibus, non contremiscat? Dum superioribus annis, in Osinanum pugnavimus, alter noster exercitus, campos omnes hosti præoccupavit, alter ex domesticis copijs coactus, qui ferebat celeres suppetias, præstolabatur ad nutum Principis: nunc hoc ipsum facit Turca, multis exercitibus, ex omnibus populis, & gentibus cōflatis, obarmatus, & circumseptus! noster exercitus loco commodo, & satis tempestivè, castra metatus est; nunc hoc ipsum facit Turca! noster exercitus, omnes aditus, omnia littora, præcluserit hosti: nunc hoc ipsum facit Turca, qui Danubium ponte

Clemens victoria.

strinxit, tormenta bellica, & omnia impedimenta
præmisit: Noster exercitus, Comeatum, & alimen-
ta sufficientia sibi parauit, deinde vndiq; locorum,
longè latèque quò iturus erat hostis, segetem o-
mnem, & gramina contriuit, vt hoc ferè stratage-
mate vicerit: nunc in eò stratagemate, ingenio sis-
simº est Turca, vt omnino nos nostravirtute, nostro
ingenio, nostro consilio opprimat, & oppugnet.

Sed quid ego, istam Tibi generose Polone in-
gero trepidationem?

Degeneres animos timor arguit, at tibi consta

In trepidus, nec te clamor, plagæq; sonantes,

Nec matutinis agitet formido sub horis,

Nec vespertinis moueat trux Spartacus umbris.

Properate sub iisdē Aquilis auspiciatissimis, fortissi-
mi & felicissimi Regis vestri, properate Poloni, ea-
dem Vos virtus, fælicitas, & diuina benignitas co-
mitatur. Si quid peccatū est audaciâ, Deū clemen-
tiss. placare pænitentiâ, fortunam iuuare consi-
lio, errorem còercere fortitudine tarditatem, cele-
ritate superare, portenta hæc, ac prodigia, quæ vos
terrent, animi submissione auertere, in meliorem-
que partem temperare debetis. An illa ex menti-
bus vestris effluerunt prodigia, quæ nobis calami-
tosisissimus ille pepererat annus, quo cum Turca fu-
riosissimo in Valachia armis confliximus? quo al-
terum

Clemens victoria.

terum Imperatorem morte præcipiti, alterum immani seruitute præreptum plorauimus, doluimus? & ad ipsam propemodum extremam desperationem adacti, nihil nisi fatum expectauimus ineluctabile? qui tum terræ motus, quæ tonitrua, quæ àëris commotiones exaudiebantur? quæ viscebantur noctibus obscuris faces? quæ volantes aquilæ, concurrentes columnæ? vt hæc omnia, nihil nisi cædes, excidia, & totius imperij tristissimum occasum protenderint? Adfuit tamen nobis in tanto mærore, in tantis periculis, atq; timore, clementique auxiliator Deus; adfuit misericordiæ indulgentissima mater: adfuerunt D. Indigetes præsentissimi, qui suam, in nos, non obscuris testati sunt propensionem argumentis. Et hoc ipso tempore Turca vobis istam inuidet victoriæ accessionem, itaque frendet, ringitur, tabescit, etiam

Rumpatur, siquidem rumpitur inuidiâ.

Magnum istud nostrum bonum est, quod iste Tyrannus execratur; magna nostra fælicitas, cui iste latro inuidet, magnum nostrum malum, magnum dedecus, quo iste parricida recreatur. An timetis eum hostem, quem toties, diu inâ virtute obarmati vicistis; à Patria vestra auertistis, abegistis, fugastis? fregistis OSMANVM, repressistis Abazi Bassam, hunc ipsum, audaciâ & temeritate iuueni-
li, fe-

Clemens victoria.

li, ferocientem puerulum Tyrannulum, cui virgæ expediendæ essent ad plagas, exhorrescitis? Quam ferox sit & truculentus in suos accipite. Supremum Religionis superstitiosæ arbitrum, quod sibi periculosum istud nobiscum prædiceret bellum, trucidavit: matrem blandissimè eadè de re, cur scilicet armis innocuam turbaret gentem, inquirentem, ferro læsit: multos suos Basso iugulavit, exulceravit multos, alios à conspectu removit suo, alios in exilium perpetuum amandavit, infinitos opibus, honore, vitâ priuavit. Quam eius vim deprimat, & coerceat Persa, quæ damna, & incendia excitarint nostri milites, leuioris armaturæ, in illius regno, nemo nescit. Nunc in Hungaria, perdidit arcem Philek potentissimam, ad Sendorow cladem accepit turpissimam, amisit Vaczow propugnaculum famosissimum: nihil illius doli, nihil stratagemata, nihil sceleratæ profuerunt machinationes. Ecce se se effert, ex illis suis latebris & ergastulis, plenus minarum, plenus furoris, plenus amentia: nihil consilij vultus spirat, præter immanitatem, nihil oculi pudoris pollicentur, præter libidinem, nihil mens fouet rationis, præter fraudes, dolos, perfidiam: trahit gentes, vastitate corporum fædas, & imbelles, linguis varias, & confusas, moribus dispares, & discrepantes: nullus illis ardor adest ad pugnam: animus ad fugam spectat paratus.

Clemens victoria.

tus. Noster cōtra hunc Tyrannū VLADISLAVS
ardentissimo animo & paratissimus exercitu pro-
greditur, & quod sufficit dicere bellator talis ac tā-
tus! plenus victoriā, & gloriā recēti, plenus animi,
plenus cōsiliij, plenus diuinæ benedictionis! robore
corporis & animi præstās, virtutib⁹ illustris, fælici-
tate eximius, Aspicite nunc animis nunc, si placet
vtriusq; Fortunam, quæ opportunitatē rei gerēdæ
summam auget. VLADISLAVS Sereniss. virili
ætate, consilia promptissima, & manū, procurati-
onibus bellicis adiungit: Tyrannus ille qui pueri-
tiā nondū excessit, præcipiti impetu, & temeritate
fertur: quicquid Turcici roboris fuit in Ianissaris;
bello absumpsit Persarū Rex diuturno: Poloni e-
xercitus vires, & gloriā auxit, & illustravit Sereniss:
noster REX, recenti Moschouitico bello glori-
osus. Quid superest, in quo Spem nostrā secundū
Deum figamus, nisi in Serenissimi VLADISLAI,
fortunā, & virtute? Ille Liunioniam feracissimam,
ille Valachiam populosissimam, tanto tempore,
ademptas nobis ditiones recuperabit, legib. nobi-
litate, libertate, firmabit: ille gloriā nominis Po-
loni, vltra Sauromatas, & glaciale Oceanū (ô no-
mina ad dedecus olim, nunc ad memoriā nomi-
nis sempiternam, nata) promouebit, amplifica-
bit: ille inuriam Vladislai, qui fortissimè cecidit
ad Varnam vindicabit: ille hunc Tyrannum, quid

G

sit fran-



sit frangere fœdera rumpere pacta, prostituere legationis auctoritatē ad contemptū, edocebit. Fauebit illi Regina Poloniæ, (hoc enim ipsa sibi Virgo genitrixq; Dei elogiū, illustri quadā apparitione, cū ad Chocimū pugnauiamus, assumpsit & adiudicauit) aderunt D. Cælites: aderit præsentissimū magni Triūphatoris Dei auxiliū: aderit Persa (vt præfidia quoq; terrestria & auxiliatrias copias videamus) virib⁹ infractus, religione propè Catholicus: aderit Moschus fœdere sanctissimo obligatus: aderit Hungarus, vicinitate nobis, & amicitia coniūct⁹.

Quid? an etiam nos frustra publicas supplicationes, hoc tempore Sacri Iubilæi fecimus, cum nostris noxis, diuinā gratiā sumus expiati? Instruamus ergo aciem, contra hunc barbarum: opponamus sanctos nostros Patronos, ab omnibus imperij partibus: siquidem ab omnibus partibus, nos, nostrumque Regnum se aggressurum, minatur. Tueantur istā nostram Urbē, atque hanc nationem, non tam multitudine, & opibus, quàm fortitudine, vel potius Dei benedictione, gloriosam, ij Indigetes, & Præstites, quorum hīc Sacra quiescunt ossa: *D. Stanislaus, Venceslaus, Hiacyntus, B. Pater Ioannes Cantius, Prandotha, Simon Lipnicius, Isaias Boner, Stanislaus Casimiriensis*: præterea *Kinga, Hedwigis, Salomea*, cæteræq; Sanctissimæ

Clemens victoria.

simæ illæ animæ, quas enumerare omnes operosum est. Defendant Principes, *Casimirus*, & *Gedrocius*, à Septemtrione patrium solum, qui multis miraculis, & beneficijs, in summis periculis inclauerūt: ab Occidente *D. Adalbertus*, & *Gaudentius*: ab Oriente *Florianus*, miles fortissimus assistat, & inuigilet, nostram enim gentem sibi elegit defendendam: *Ladislaus* à *Gelnow* auspicatissimi nominis & ominis, Hungaricum impetum còerceat: *Ioannes Duclēsis*, sui *Capistrani* vim, & spiritū imitetur. Adsint deniq; noui Patroni & Indigetes, *B. Innocentius Cadlubinus*, Singularibus hoc tēpore beneficijs insignis & eximi⁹: *B. Iozaphatus* Archiepiscopus *Połocēsis*, cuius martyriū & merita recētia vigent. Iam instructa acie pugnemus, contra *Othomannidem*, certissimamq; rem, summā animi cum submissione, teneamus, hoc beneficio, quod diuinā benignitate, de *Moscho* recepimus, iacta esse fundamēta, omnis libertatis, omniū victoriarū, omnis gloriæ, & quod amplissimum decus est atq; gaudiū nostrū, Religionis Catholicæ propagatæ, & propagandæ. Hoc pro beneficio, solennem gratiarum actionem instituimus, mente, voce, cantibus feruentissimis, læti & alacres ingeminamus:

Te Deum laudamus, te Dominum confitemur:

Te æternum Patrem omnis terra veneratur.



Ad Almam Acad. Cracouien̄.



F Vnde salutiferas felix Academia voces,
Iam finem belli Moschus inermis habet.
Inde senes, matres, pueri, innuptæq; puellæ
Victori, laudes dant sine fine, Deo.
Iam spolijs incedit onustus miles opimis,
Rursus, & infractas, vibrat in arma, manus.
Iam Patrias, intrat Rex clementissimus, vrbes,
Ciuibus ingentem letitiamq; mouet.
Hoc pariter cum, fortis Eques, Sapiensq; Senator,
Bellum consilijs acribus ingeminant.

Victo-



*Victoresq; mouent Aquilas, te Spartace contra,
 Spartace lunatis ambitiose sagis,
 Spartace, femineis nimium legionibus audax,
 Spartace, robustis excutiende viris.
 Spartace, nostrorum diues discordibus armis,
 Spartace, concordi federe, pauper, inops,
 Spartace, quò frustra tendis furialibus ausis,
 Spartace, te vincet Sarmata victor ouans,
 Spartace, Victori audes, contra insurgere Regi,
 Spartace, iam certum te manet exitium.
 Spartace, Stultitiæ monstrum, cui lumen ademptum
 Iudicij, propera, quò tua fata trahunt.
 Funde salutiferas felix Academia voces,
 Vt trux finem habeat Spartacus Imperij.*

ADAMVS GEORGIVS OSSOLINSKI
 à Tęczyn Succamerarides Sandomiriens.



Christophorus Varzeuicius, Canonicus Cra-
 couien. Turcicam xiv. sic concludit.

Multa quidem bella, aut ratio concordiae sustulit, aut
 prosequendi difficultas restrinxit, aut tempus, &
 necessitas ipsa mitigauit: hoc vnum Turcicum bellum,
 nec sine periculo potest, neque sine Dei hominumque
 iniuria debet; vel segniter geri, vel ad aliquod tempus
 intermitti, vel sicuti grando aliqua, in alieno agro, pere-
 untibus socijs, ociose inspectari.

❁ ❁ ❁

Stanislaus Orzechouius, ad Equites Polonos,
in Oratione, de bello aduersus Tur-
cas suscipiendo.

Illa, illa sunt vestra ornamenta Equites, ille est vir-
tutis vestrae, atq; gloriae Campus, Valachia, Moscho-
uia, Russia, Hungaria. Harum prouinciarum victo-
rijs, atque trophaeis, nobilitata est Virtus vestra, & in
ista honoris atque dignitatis sede, Regum vestrorum
testimonio, collocata: sicque ornata ab illis est, vt Re-
ges non Ciues, domini non subditi, huius Reip. esse vi-
deamini. Et tu tamen tot exemplis nobilitatus, tot
testimonijs, maximorum Regum illustratus, abdes te
in otium? latitabis in syluis? hostem negliges? sta-
tionem relinques? Imperatorem desereres? arma etiã
ne quod belli signum domi tuae fortè sit, conuertes in
vomeres? viues cum Iudice? Causidico seruires? Com-
missarium Sectabere? & cum hac cohorte, vicini in-
sidiabere agro? & tanquam in hostico, in ipsius for-
tunis impunè grassabere? Et adhuc ô bone custos iu-
ris publici, pacisq; Communis, Equitis tibi vsurpabis
nomen, cum tuus equus nunquam in acie fuerit, nun-
quam castra, nunquam hostem viderit: sed semper in
dolore & gemitu Ciuium tuorum sit versatus? &
cum tu postremo ipse, pecuniã aratoris tui, vendide-
ris of-



ris officium nominis, atq; militiæ tuæ? Non sic maiores nostri, Equites, non sic. Nunquam illi mercenario milite defendebant patriam, nunquam imperatâ pecuniâ; & breuiter, vitam illi prius, quàm officium relinquebant, quare in hoc uno occupatis, raræ erant lites, iudex rarus, commissarius, Causidicus, ferè inauditus.

Nicolaus de magna Concice MNISCHEK,
Palatinides Sandomiriëñ. in oratione quâ
rumpendum esse fœdus cum Turca
ictum, suadet.

Ipsa Patria si disertâ voce alloqui vos, atque affari posset, nonne hoc pacto vos compellaret? O vos erga me ingratos, & incautos infortunij vestri! Vos immemores religionis vestræ, quid rerum geritis? quid in salutem cōsulitis, an expectatis, dum hostes præparati imparatos inuadant, prouidi improuidos opprimât, armati inermes iugulent? expectatis dum per inanem metum, qui animis vestris infidet, regimen Polonicum, ex manibus vestris eripiant? En habetis hostem non procul nostris præsidijs submotum, habetis in antiquis finibus auitæ ditionis. Non commemorastis Moldauiam, Valachiam, Transylvaniam, certissima horrea fru-



rea frumentaria, patuisse Othomanis, interclusa Polonis, & Christianis citerioribus. Ecce eisdem in terris, quas fœdere vobis interceptas, dum possidet, & non nuper admodum sibi ademptos populos miserrimè vexat, oppida aut defensâ expugnat, vel relicta suis infidet præsidij, aut pagos, fugâ agrestium desolatos incendit, ad vos viam struit, aperit, munit. Vos verò (tanta est amen- tia, tam cæcus hominum furor) quasi hæc minimè attingant, non sentitis, non videtis; aut si sentitis, per socordiam contemnitis. Non sic maiores nostri, non sic, in omnes Reip. partes inten- debant: sed colonus fruge, miles armis, exemplo Sacerdos, operam in remp. probabant suam.

*Impensis ex fundatione perpetua Generosi olim
Domini Bartholomæi Nowodvorski, Equi-
tis Melitensis, S. Ioannis Hierosolimi-
tani, Cōmendatoris Posnaniæ.*



interclusa
e eisdem
um pos-
otos po-
ensa ex-
t pagos,
os viam
t amen-
minimè
sentitis,
maiores
inten-
mis,

rosi olim
Equi-
imi-

